

Samgöngu- og sveitarstjórnarráðuneytið
b.t. Kristínar Söndru Karlsdóttir
Sölvhólsögötu 7
101 REYKJAVÍK

Reykjavík, 2. febrúar 2021
Tilvísun: 2020123088/PS

Efni: Umsögn Persónuverndar um drög að reglugerð um netöryggissveit (CERT-ÍS)

Persónuvernd vísar til beiðni samgöngu- og sveitarstjórnarráðuneytisins frá 15. desember 2020 um umsögn um drög að reglugerð um netöryggissveit (CERT-ÍS), sbr. reglugerðarheimildir í meðal annars 4. mgr. 21. gr. og 28. gr. laga nr. 78/2019 um öryggi net- og upplýsingakerfa mikilvægra innviða.

Ljóst er að netöryggissveitin gegnir mikilvægu hlutverki í tengslum við gagnaöryggi, þ. á m. öryggi persónuupplýsinga, einkum þegar um ræðir þá aðila sem teljast til mikilvægra innviða í skilningi 13. tölul. 6. gr. laga nr. 78/2019, sbr. 14. tölul. sömu greinar. Þegar litið er til þessa er ljóst að efni reglugerðardraganna í heild sinni varða starfssvið Persónuverndar. Þá hafa drögin að geyma ákvæði sem hafa beina þýðingu vegna vinnslu persónuupplýsinga og öryggisráðstafana hjá netöryggissveitinni sjálfri, sbr. 2. og 3. mgr. 5. gr., 2. mgr. 19. gr., e-lið 2. mgr. 21. gr. og 29.–32. gr.

Mikilvægt er við setningu reglna um vinnslu persónuupplýsinga að gætt sé jafnvægis. Í því felst að við mótnun heimilda til vinnslu persónuupplýsinga sé ekki gengið lengra en nauðsyn krefur. Þá verður meðal annars að meta hvort þörf sé á sérstökum ákvæðum um ráðstafanir til að gæta öryggis við vinnsluna.

Af reglugerðardrögunum er ljóst að litið hefur verið til framangreinds við samningu þeirra og má þar nefna 29. gr. draganna, þar sem fjallað er um ráðstafanir til að tryggja öryggi gagna og upplýsinga, 4. mgr. 30. gr. draganna um varðveislutíma upplýsinga, svo og 32. gr. draganna um sérstaka þagnarskyldu starfsmanna netöryggissveitar.

Persónuvernd telur ekki sérstakt tilefni gefast til athugasemda við einstök ákvæði reglugerðardraganna. Hins vegar minnir stofnunin á mikilvægi þess að gæta að kröfum persónuverndarlöggjafar við vinnslu á grundvelli reglugerðar sem sett kynni að verða á grundvelli draganna. Þá skal tekið fram að verði óskað frekari umsagnar um einstök atriði verður hún fúslega veitt.

F.h. Persónuverndar,



Þórður Sveinsson



Gyða Ragnheiður Bergsdóttir